

嘉筆禾微獻錄

嘉禾徵獻錄卷三十九

儒學

郡人盛楓丹山輯

男泰煒校訂

徐一夔

朱晃

張俊

邱贊

宗昇

沈一德

周衢

趙純

魯烈

沈桐

莊嚴

子日思思子鱗

張志學

江敬

許伯全

珣

馮瑞

子羣

肯堂

姚舜聰

父亮子遲

高夢說

柏齡

錢鈞

呂珍

子翱

陳善

孫詢

徐

輔

子穆種

孫

浩

女適錢

僕沈鸞

徐

縉

祖朝子藻

祖母王

朱

甫

子道亨子用先光妻王

徐弘澤

父需

孫開禧

子汝彬

邱民

李進

范樞

詢

賀道亨

濮淮

丁文華

沈東

陳五禮

戴叔遠

縣文鋒

徐一夔字大章本天台人博學善屬文見知翰林學士危素授以建寧路儒學教授牒方谷珍據海上泛宅於禾寓白苕里與鮑恂邱民輩游晚歲僦屋春波門外庭有柞樹大五十餘圍高可五丈為獨柞軒記將終老焉洪武初徵修禮書明年書成還將續修元史王徵為總裁官以一夔薦一夔遺書曰邇者縣吏

傳命言朝廷以續修元史見徵且云執事謂僕善敘
事薦之當路私心竊怪執事何惓惓於不材多病之
人也僕素謂執事知我今自審終不能副執事之望
何也近世論史莫過於日厯日厯者史之根柢也自
唐長壽中史官姚璹奏請撰時政記元和中韋執誼
又奏撰日厯日厈以事繫日以日繫月以月繫時以
時繫年猶有春秋遺意至於起居注之說亦專以甲
子起例蓋紀事之法無踰此也往宋極重史事日厈
之修諸司必關白如詔誥則三省必書兵機邊務則

樞司必報百官之進退刑賞之予奪臺諫之論列給
舍之繳駁經筵之論答臣僚之轉對侍從之直前啟
事中外之囊封匭奏下至錢穀甲兵獄訟造作凡有
關政體者無不隨日以錄猶患其出於吏牘或有誤
失故歐陽忞奏請宰相監修於歲終檢點修撰官日
所錄事有失職者罰之如此則日歷不至訛失他時
會要之修取於此實錄之修取於此百年之後紀志
列傳取於此此宋代之史所以為精確也元朝則不
然不置日歷不置起居注獨中書置時政科遣一文

學掾掌之以事付史館及一帝崩則國史院據所付修實錄而已其於史事固甚疎畧幸而天厯間虞集仿六典纂修經世大典一代典章文物粗備是以前局之史既有十三朝實錄又有此書可以參稽而一時纂修諸公如胡仲申陶中立趙伯友趙子常徐大年輩皆有史才史學厯而成書至若順帝三十六年之事既無實錄可據又無參稽之書惟憑采訪以足成之恐事未必覈也言未必馴也首尾未必貫穿也而向之數公或受官或還山復各散去乃欲以不材

多病如僕者承之於後僕雖欲仰副執事之望曷以
哉舟至嘉興驛足疾大作不能前謹奏狀左右乞賜
矜答一夔遂不赴壬子用薦署杭州教授召修大明
日曆書成將授翰林院官又以足疾辭賜文綺遣還
癸亥帝以靈谷寺初建敕一夔自杭州撰碑文以進
稱旨賜蟒衣綵幣時三司衛所撰進表牋皆令教官
為之以嫌誅戮者接踵如則嫌於賊生嫌於僧帝靡
嫌於帝非法坤嫌於髮髡有道嫌於有盜往往而是
一夔撰賀表有先天之下及為世作則語上大怒禮

臣因請頒表式帝遂自為文布之一變得以幸免靜
居詩話元時進賀表文觸忌諱者凡一百六十七字
著之典章使人不敢犯其法良善逮明孝陵恩威不測
每因文字少不當意輒罪其臣若蘇平仲徐大章是
也當日有事園邱惡祝冊有予我字將謹撰文者挂
正字彥良言於帝曰予小子履湯用於郊我將享
武歌於廟以古率今未足深譴帝怒乃釋可謂聖於
悟主矣一百六十七字者極盡歸化亡播晏徂哀奄
味駕遐仙死病苦沒泯滅凶禍傾頽毀偃仆壞破晦
刑傷孤墜隕服布孝短夭折災困危亂暴虐昏迷愚
老邁改替敗廢寢殺絕忌憂切患衰囚枉棄喪廢寧
陋厄難忽除掃損缺落憲法奔崩推殄隕墓櫨出祭
奠饗享鬼狂蔽怪漸愁夢幻弊疾遷塵元蒙隔離去
辭追考板蕩荒古述師剝革睽違尸叛散慘怨克反
逆害戕殘偏枯眇靈幽沉埋輓斥退換移暗了休罷
覆弔斷收誅厭諱恤罪辜愆王別逝泉陵殃此延祐
元年十一月取定擬至三年八月寬其禁矣其字樣

雖難悉避然亦玉堂
視草者所宜知也

在事九年乞歸卒於禾有始豐

崇六卷

明史稿
有傳

朱冕字士章嘉興人永樂庚子舉人正統初為通許
教諭再補崑山課士勤而嚴事上官從容有體巡撫
周忱行部至崑山甫登岸盛怒欲撻一人冕請至府
治之至府忱召冕問故對曰下車之初觀瞻所係因
怒傷人恐累盛德忱謝之

乙未太倉開設衛學

忱奏保冕為太倉鎮海兩衛學教授且語衛弁云吾
為爾子弟得一良師冕月試諸生必用全場題

水東
日記

崑山教諭嘉興朱士章先生季考月試勤而且嚴其
考二場文字厭人作詔誥以字數少不能襯貼見才
也課習駢麗體授以作表之法曰起語須切題不爾
則號大家僕頭及門被其教如鄭文康葉盛皆舉高
科刻文為程凡三學所貢試禮部者皆彬彬典雅矣
江南通志兩浙
名賢錄俱有傳

張俊字文英崇德人宣德己酉舉人景泰間為太平
府教授誠朴而富於文學課士恩義兼盡終其府伴
讀見太平府志

邱贊嘉興人景泰丙子舉人安慶府教授以嚴正範

士一時畏服

見懷寧志

宗昇嘉興人國子生天順間為睢州學正隨人資性限以程課日稽而月試有進者集衆獎勸之否則懲戒之一生遺以束脩明日試所誦書未能悉記面斥還之其人感愧向學終永州府教授

睢州志有傳

沈一德嘉善人萬曆癸酉舉人知崇明縣改永嘉教諭誠確端方作士有法淡於聲利齋居寒素泊如也

見溫州府志

遷漳州府教授

周衢字士亨平湖人為諸生邑當新創人文未著獨

衢篤學慕古景泰改元中浙江鄉試任膠州學正以
禮率人訓迪無倦諸生有衣食不給無力喪葬者出
俸助之告歸肆力經史根極性命之學兩浙名賢錄有傳

趙純字希文嘉善人景泰癸酉舉人階州學正善造

就人材數舉科目又出俸錢鑄祭器供祀事終韓王

府教授明嘉善志純學於項忠土木之難忠隨北狩

後忠還柄用提兵征土達純為襄陵王府教授忠感

其義而恤其私有將校坐法當刑謁純求解純卒不
以私撓法忠益重之卒於官

魯烈字克承一作元承平湖人父至孝待宗族有恩嘉

靖間以鄉貢為吳江訓導諸生貧者輒分俸周之遇
歲荒設粥以賑飢又委曲勸賑上官重之秩滿遷澧
州學正歸有田六十餘畝割其半以予兄若弟淡泊
終身

見兩浙
名賢錄

沈桐字春波嘉興人鄉貢萬厯間為蘇州府學訓導
修南畿志六十四卷遷滁州學正博雅端方以師道
自重為訓導劉恩所擠斥歸諸生成惜之

滁州志
有傳

莊嚴字銘五嘉興人為諸生試輒居首天啟中以貢
為山陰訓導終靖州學正子日思鄉貢日思子麟崇

禎壬午舉人

順治壬辰進士

張志學崇德人永樂癸未舉人永福教諭補長樂終日危坐講學一時人物多其造就

見福建省志

江敬海鹽人永樂辛卯舉人宣德中故城教諭深沉有氣節循循善誘以禮自持

見故城志

又為建寧教諭建

柳志作肅寧

許伯全海鹽人永樂丁酉舉人正統間為吳江訓導歷樂安新昌教諭甚有恩於士子子珣

珣字士章為人靜慎終日無惰容正統丁卯中式

明年授安溪訓導景泰庚午典應天鄉試以母老乞
歸教授於家劉泰張寧鄭延皆其門弟子也泰先珣
登科寧與珣同榜中式珣居家日三應聘為河南陝
西江西同考

徐輔本姓林字良弼崇德人正統戊午舉人長洲訓
導遷永新教諭充廣東同考遷崇府紀善進審理正
輔為人簡重不苟言笑有怡素集子穆平江訓導種
蔭崇府典儀

馮瑞字信之平湖人弘治間歲貢授建安訓導終丹

稜教諭子翬字尚升嘉靖間為寧國府學訓導陞長垣教諭

孫浩字室齋其先本鄞縣人革除中坐方孝儒事謫戍海寧衛遂為海鹽人浩國子生授浦城縣丞司邑之雜稅并領驛務供事而已不求盈羨三年告歸女適同邑太常錢薇遺以朱子大全集一部謂之曰讀此於理道不貧矣居鄉每以強直濟事人不能撓

肯堂字以升浩子嘉靖中以貢授應天府學訓導遷鄱陽教諭歸老於家倭亂幾遇害為僕沈鸞救○

沈鸞海鹽人嘉靖甲寅五月五日海寇猝至肯堂買
舟以避既復棄舟奔城東臘蜡灣遇賊餘僕皆逃鸞
獨向賊叩頭且伸頸曰寧殺我毋殺我主賊以刃加
其頸言不變遂舍去俄隅河賊以矢擬肯堂鸞復輓
前賊求救獲免時肯堂僊不能行鸞覓舟以登其子
意肯堂死矣追遽來求屍相見大驚肯堂曰我餘生
鸞與之也

徐縉字朝儀海鹽人祖潮早夭祖母王以苦節聞縉
嘉靖中鉛山訓導就遷本縣教諭罷歸死於倭寇子

藻詣闕上書乞集鄉兵勦賊召見許之賜名忠孝軍
又乞濟師已遣工部侍郎沈良才尋改敕趙文華調
京營山東河南陝西兵合二十萬至浙費軍資數百
萬計乍浦沈莊之戰藻在行間有功不受賞而歸

姚舜聰字伯達秀水人父充字叔信號元岳山人父
為讐家陷獄充請代繫僧正念以能詩與充交時亦
在獄相得甚歡事白出獄遠游者數十年著尚撓草
八卷詠物篇二卷舜聰亦能詩嘉靖中鄉貢歷休寧
海陽奉化三縣訓導終龍游教諭有好古集蠟言漫

游草子遲字士先萬厯戊午舉人知德化縣年八十餘卒姚氏族譜伯達為博士日有生員官糧二十餘金無以償將求死詣伯達言別伯達惻然留之學署為釀金資之生得無死後夢神謂之曰爾父之嗣今安雖孕女也以救生故得轉為男試於生後驗其陰猶獨腎也及生果然因名曰遲

朱甫字子美崇德人嘉靖中鄉貢為歙縣訓導時許國尚幼甫特賞識之後國以一甲第三人登館閣遷涇縣教諭端嚴持重校士先器識而後文藝不以束脩為輕重嘗捐俸以給諸生之貧者去官日士民感其德立碑紀之縣志子道亨亦以貢為諸暨訓導溫

和鎮密有父風子用光萬厯丙子解元早卒妻王及妾馬氏諸氏皆苦節

高夢說嘉興人食貧授徒從游甚衆後以鄉貢入京內閣中時行時為詹事延為子壻師授華亭教諭以老歸日焚香宴坐講攝生之術脩然自適著蕉鹿醒言希白吟草

徐弘澤字潤卿號春門嘉興人父霑字洪川以義舉考滿得恭城縣丞未至官卒澤不樂求仕嗜法書名畫評賞臨摹無虛日家貧乃逐什一之利居闕閤中

市塵紛囂獨與客下簾園基或竟日忘其所業處士
陳繼儒侍郎沈思考太僕李日華數從之游澤為畫
蒼古突兀不求入時目長子汝彬為武清衛總兵以
舟迎之喜曰我眉天下明秀之區我所願游乃溯峽
以上經絕險窮巖壑之勝畫益工歸里嘗集善畫者
七人為別有社作江干七樹自為之序曰予既題別
有社因念我郡博洽好古於筆墨中獨造閭奧者為
九疑先生他日持過之共商畧可否先生曰寫山不
如寫樹樹有向背左右老穉榮悴不專在離奇形似

古人有江干七樹之目能令位置閒雅思過半矣即
具二紙乞先生父子圖之留為矜式復命兒子齡於
修禊時集同人於虹川草堂各寫一圖期不限刻紙
不限方各出意匠是日天氣晴麗晨風颼颼齋前竹
影受風搖寫如百千小鳳往來屋壁間酒蔬淡泊而
蒼頭適從九龍來攜得泉水即命煮以天池茶葉春
芳直沁心腑正不知月團三百斤如何足貴也圖既
成若證之之蒼翠古雅如觀武庫法物幼節之精密
周布如聽小窻兒女叨咀不休又若衛伯之宏放如

游雲在霄風捲為一君求之秀色如西山朝爽其他
若伯璘道叔際霞俱亦獨當一面肌骨清冷而兒子
齡亦支離攘臂其間鮮鮮楚楚在好事者足詫勝集
矣就中髮白面縐齒彫形瘁踴躍矜壯不減據鞍狀
者為不佞不佞圖最晚成楮凡再易及竟仍粗率不
足觀倘賞識者欲於牝牡驪黃之外存此洒散一種
則神韻差足留他日合持以示九疑不知更作何許
論定也時年七十有三孫開熙字子雍崇禎己卯舉
人

柏齡字節之號樗菴弘澤仲子崇禎庚午舉人受
知學士黃道周以丁丑副榜授永嘉教諭唐藩建號
徒步走福州上書言事拜國子助教尋轉戶部福建
司主事詔往泰順覘進止未至而溫不守倉皇竄窮
谷中入天闕山展轉瀕死期年而歸或招之仕不應
柏齡亦以詩書名晚歲旁叅三乘及方書命訣穴法
深自晦匿年七十三卒

邱民字克莊江都人流寓嘉興年三十至正壬寅舉
浙江鄉試輟耕錄是年有作彈文內云就禮部試時
邱民韓明五日前預知題目

諸文士寓禾者餞於郭門外天台徐一夔為文送之
稱其不屈於張氏食貧自苦既第進士累官禮部郎
中尋出監河南行省事洪武初薦授松江府學訓導
未幾自劾罷民能詩至正辛丑郡遭張氏之亂兵火
稍息時永嘉曹容字斯民為府教授以暇出西郭憩景
德寺同游者凡十四人用唐人因過竹院逢僧話偷
得浮生半日閒之句為韻賦詩民亦與焉十四人者
呂安坦鮑恂牛諒字士良東平人禮部尚書釋智寬字裕之吳江人常真
張翼王綸朱志道聞人麟徐一夔尤存周棐四明人民

及睿也

錢鈞字志衡嘉興魏塘人今土斷為嘉善洪武中以明經薦授本府儒學訓導性嗜吟詠後以疾辭嘗乘扁舟放浪雲水間有半隱集自號小西湖漁者復聘至京卒

李進字孟昭晚號西園居士嘉興人力學通五經尤長於春秋為文春容宏辨旁工楷隸行草諸法喪哀毀眇目不復求仕太守齊政重其名起為本府儒學訓導見兩浙名賢錄永樂庚子為福建鄉試主考癸卯又

主山東鄉試為詩純雅與同郡李孟璿兄弟唐幹唐
綸懷悅先後齊名同郡少傅俞山受業於進山子誥
為梓其遺文曰西園先生集凡五卷靜志居詩集孟
用和士林詩選取以壓卷句如杏花村裏青旗酒楊
柳隄邊畫鷁船三月東風初去雁一番新雨又飛花
菰蒲風外呼漁艇楊柳陰
中認酒樓句有晚唐風致

呂珍崇德人正統甲子舉人官上海訓導子朝景泰
癸酉舉人天順癸未會闈火御史焦顯局其門士子
焚死者九十餘人朝亦在焉國子學正閻禹錫字子
陽請加優卹皆贈進士出身禮科給事中何琮駁其

非是上下禹錫錦衣獄訊治既而如其言皆贈進士
出身御製文祭之詔集遺骸為六大塚葬於朝陽門
外題曰天下英才之墓弘治甲子南禮部主事主偉
奏其父照亦以是年會試焚死前奉恩卹乃今年歲
久遠官無主守歲無祭祀各家子孫因道遠不能省
視以致居民侵毀乞令有司修築立祠壇與之祭上
令順天府葺其牆垣加以門匾別立祭亭三間鐫刻
英宗御製祭文且令人看守禁絕樵採嘉靖末增築
外城六塚遂夷為平陸亭及御製碑不可考矣

范標崇德人正統中為東流訓導謙和平易甚得士

心池州府志有傳

陳善字敬佐海鹽衛左所軍籍天順中以貢入國學
不樂仕邑令李雲勸之乃出為崇陽訓導未幾歸好
為詩文求者非其人雖重幣弗許也見兩浙名賢錄孫詢字
士問號墨山工篆隸為秦漢章摹勒俱有古法畫山
水極精求畫者載酒就訪飲酣潑墨窮極天巧

賀道亨嘉興人性淳樸生平無妄語嘉靖乙酉鄉貢
授將樂訓導待士以莊非公事不見歸閉戶讀書至

老彌篤年九十七而卒

濮淮字大川嘉興人嘉靖間鄉貢授仙游訓導

兩浙名賢

錄作延平受知僉都御史海瑞在閩時值倭亂日夜

與其令謀畫守禦城賴以完年老乞歸喜讀易豫知死期先時告廟謝別交知賦詩而絕年八十五子孫有以書法名者

丁文華字質夫號一匏平湖人嘉靖間宜興訓導

山祐

雜說嘉靖乙酉提學進賢萬公考嘉興余與師丁一
匏同入試一匏倉遷中謂余曰尚坐相近試題為我
一議余但唯唯然坐竟不相近終日不得交一言試
畢余問故一匏云吾甥吳恪夢汝至吾家汝上座吾

下座吾與汝俱變為虎跳躍久之復為人吾送汝出門汝乘青雲上升引手下接我亦得至雲端意此考或得汝力也及出案余居首一範竟不與後一範以年資應貢適新例起選鬱鬱不得意後余舉進一座主林退齋先生雲同擢余為房首問余所從學一範對未幾退齋督學吾浙臆余言一範乃得謁余第在壬辰而乙酉之考已為之兆一範仕進亦兆於此

沈東字啟明秀水人嘉靖中德安府訓導操履端方教弟子以嚴肅丁母憂歸極哀毀不爐不扇不踰外閭者三年服闋不復出讀書博洽有古君子之風

陳五禮嘉善人萬歷中為績溪訓導誠樸端莊士子

咸敬服之

見績溪志

卷三十九

戴叔遠字元邁嘉善人博通經籍士爭師之尤篤友
誼與同邑朱廷旦王佐孫文鋒相友善稱刎頸交文
鋒字韞生鄉貢為昌化教諭叔遠亦以貢授象山訓
導文鋒以疾去官卒於家叔遠聞訃即間道歸哭之
大慟嘔血數升而死

嘉禾徵獻錄卷四十

武職
外省軍衛

郡人盛楓丹山輯

男支焯校訂

朱先孫祖文

陳文治

金丹

沈惟敬

王驥

周翼明子元起

兄憲明

俞迪

呂相周

曹通

胡景

汪繼祖

李東

祁壽

張原真子觀音保孫成

朱先字後之號秋崖秀水人後遷嘉善膽力絕人以
販私拒捕論斬倭寇沿海地方總制胡宗憲出之獄
使充隊長一日得級十三宗憲竒之授守備銜稍擢
海寧衛正千戶改蘇州衛指揮使調海寧把總遷薊
鎮南兵營叅將俄進副總兵宗憲被逮先解官護行
宗憲釋還先乃歸還福建等處鎮守總兵官御史按
福建巡撫王詢侵軍實檄先證之先曰先王公邵將
也不敢誣府主御史怒坐先萬金論死繫獄閱八年
始白萬厯初用薦起圖山把總厯南京前軍都督府

僉事內教場總兵官總理京營事務以年至請老優
詔致仕先在官廉勇善戰有惠愛撫循士卒每得其
死力閩人戴之如父母凡歷疆場四十餘年絕聲伎
之好亦不置田宅園圃其處宗憲詢二事尤有國士

風

明史稿附
戚繼光傳

先孫祖文字完天徙居吳縣為諸生周

順昌被逮祖文間行詣都為納餽粥湯藥及徵贓令
急奔走稱貸諸公間順昌觀歸祖文哀慟發病死見

史稿周
順昌傳

陳文治字國章秀水人精醫卜之術豪舉武健嘗以

生命問日者曰君貴當至二品惜死囹圄中文治笑而不答後為府吏坐舞文遣戍新河所立微功積官偏裨萬厯初以六壬術入少保戚繼光幕授海寧衛前所百戶稍遷指揮同知以都督同知為薊鎮東協分守燕河副總兵官駐昌平其後邊騎闌入殺傷軍士無算文治與督撫周詠瞿繡裳等匿其事埋屍地中植雜菜其上更以捷聞朝廷為告廟頒賞文治既久厯諸邊又結中貴及左右大臣將奪繼光兵柄繼光嗾巡按御史李植發其匿敗冒功事朝遣御史往

勘至其處皆砂磧獨菜畦青翠彌望發之屍在焉創
痕歷歷即其所答文治三十以狀聞坐斬長繫霸州
十餘年卒於獄文治與同郡談相皆以吏役起家至
通顯皆不得其死其在昌平酷暴異於諸將杖殺部
伍若刈草菅嘗與鄉故飲盤案稍不當意縛庖人置
雪中客去庖人僵凍死矣每念日者言欲求去卒不
果遂及於敗

金丹嘉善人少為諸生以舌辯稱長於計畫善著數
好拳勇坐事被禡乃出充軍卒嘉靖癸丑倭寇郡主

帥授以鹽丁五百人令將之遇賊先登總兵戚繼光
觀其行陣以為才上之制府令為游兵裨將尋授千
戶平妖賊李松於烏鎮受賞即真隸指揮是時督臣
胡宗憲遣蔣洲等入海未歸皆憂其不還募能再往
者賞不次丹遂往說徐海陳東等成約而還題授本
省都司從繼光勦閩廣諸寇歷福建廣西叅將遷副
總兵官論諭降功蔭一子世襲本衛副千戶表幾論
罷丹在軍穆然儒素然遇事英果故所向有功兩浙
名賢
錄有子病廢以從子某承襲

傳

沈惟敬平湖人嘉靖末倭寇江浙惟敬出入賊中事
定因好談倭事萬厯中惟敬老矣家貧走京師與方
士談鉛汞之術兵部尚書石星方以東事為憂未知
所出有妾袁氏鍾愛惟敬與妾父袁翁善會溫州人
沈嘉旺自倭逃歸鬻身惟敬言日本無他意止求入
貢為朝鮮所遏故舉兵為今計折東招之可致惟敬
為表言之袁以白星星召問見其長髯偉貌指陳了
了大悅即題假神機三營游擊嘉旺亦假指揮令入
日本以徵貢事委之臺諫交爭不為動惟敬出海留

金山年餘倭酋行長渡大同江繞出平壤西界惟敬
三入倭營說令受款罷兵行長許之朝廷復遣制使
二人往封以惟敬為宣諭使偕渡海是時正使臨淮
侯李宗城以淫縱觸倭怒懼而逃朝命不行乃以副
使楊方亨充正而以惟敬充副使至山城州草草畢
封事而倭留朝鮮者卒不去貢事遂裂星下獄惟敬
逮捕至京論斬妻子給功臣為奴惟敬本無子其妻
陳名淡如南都娼也惟敬誅後與嘉旺俱逃不知所
終或言仍入海去初封貢議起同郡袁黃以職方主

事贊畫東事主亦惟敬言其幕下山陰馮仲纓吳縣
金相皆奇士黃問纓相曰倭酋行長使小西飛來約
將軍李如松以明年正月入平壤受冊退師其言信
乎纓曰信然則東事可竣乎曰未也黃曰何謂纓曰
平秀吉初立國內未附行長闕白之嬖人欲假寵於
我以自固故其言信也如松恃寵近稍桀驁又新有
寧夏功自謂中朝無出己上者肯令一游士掉三寸
成東封之績而束甲以還乎彼必借惟敬封期佯為
款貢以襲平壤襲而不克則敗軍襲而克則敗封故

曰東事未竣也相曰襲平壤必克克而驕必大敗敗
封與敗軍皆有之黃曰善正月惟敬偕朝使往封如
松尾其後襲平壤入之所部遼兵割麗人首以獻功
黃面數如松敗封殺降如松大恨未幾如松乘勝進
取王京遇伏大敗於碧蹄館退保開城又戰於南原
大敗如纓相言總兵麻貴謀棄走鴨綠江時常熟蕭
應官以山東按察使監督朝鮮軍務如松敗時應官
謂惟敬曰均屬朝廷事何得以猜嫌坐視卿可疾作
書示關白不戰而屈當上爾功惟敬乃夜作書馳達

闕白不數日倭與如松遇於青山稷山不交一矢而退倭退而劾惟敬者愈衆應宮力爭之不得卒論死惟敬死黃亦中察典後東事平受封人言議始惟敬宜無罪至熹廟時猶有稱其冤者

王驥本名納字元重嘉興人弱冠游京師歷塞下以能詩名嘉靖戊午寓籍通州衛中式順天鄉試武舉不第久之授西寧衛鎮撫未幾坐累謫曹濮營守備多擒賊功為忌者所中以軍政論罷不得白客死任城

周翼明字季醇號廷璋乍浦所軍舍兄憲明萬厯癸卯己酉壬子三科武舉嘉區後營把總翼明亦中萬厯丙午己酉武舉庚戌進士授昌國把總遷本營守備有賈舶泊外洋至同官欲借為功翼明持不可中讒歸幕府檄署臨觀金盤倭犯溫州翼明率兵出大洋援勦抵魚山多斬獲撫順失守徵援翼明請行與總兵喬一琦將八營兵而北以副將隸都督劉綎為先鋒由寬甸路深入五百里破牛毛馬家董右深河古火狐狸等十五寨至橫壤北軍偽為杜松軍號聲

言合兵翼明開門納之入營而覺兵大潰翼明上青石嶺力戰中流矢死年四十三事聞贈都督僉事賜祭葬建慰忠祠以祀之子元起實授百戶世襲

俞迪字允吉平湖人天順中以鄉貢為廣東都司斷事朴茂好古清節凜然有指揮王江失機監司欲并坐指揮于某屬案迪之迪曰國法坐失機死者不得襲于非其罪力爭得免于潛以千金謝迪堅却之三年挂冠歸于泣拜曰祖父汗馬之勞子孫幾失之得公以無恙敢忘大德哉他無敢請願以弱息奉箕帚

迪曰余老矣次孫未婚以為媳可耳于益感謝結婚

而歸

見分省人物考

呂相周字公輔海鹽人嘉靖中入貲為國子生將授府幕官相周自以材武請改武階效力行間授杭州右衛署指揮僉事尋即真

曹通海鹽人永樂中以軍功授儀真衛左所百戶卒子敏嗣敏卒子謙嗣謙卒子鏜嗣鏜卒子憲嗣憲卒子占芳嗣占芳卒子嗣彬嗣

胡景海鹽人失其黃籍所由景泰中世襲南陽衛左

所副百戶成化二年赴調征遼左深入有功遷本所正百戶

汪繼祖海鹽人弘治中為階州右所正千戶

李東海鹽人正德中為西固城所正千戶

祁壽嘉興人正德中秦州衛指揮同知自胡景以下四人先後本末不具見

張原真海鹽人洪武十年為軍卒隸杭州右衛調紹興右衛卒于觀音保勾補三十四年充海運汛守高資港靖難初授總旗卒于成補正統十三年從寧陽

侯征福建有功遷百戶景泰四年調海寧衛右所百
戶卒子昇嗣昇卒子元正嗣元正卒子承祿嗣承祿
卒子應斗嗣應斗卒子鰲嗣

嘉禾徵獻錄卷四十一

海寧衛

郡人盛楓丹山輯

男支焯校訂

劉江清

祖永受父海

寧

銳

子湘汗問

徐

鑑

祖進父道齋

玠

行健

子志達志伊

行權

王

信

勇

方

正

祖勝父原

泰

戡之

采

旺父興

煉

九德 子英

紹賢

嚴

政

父嗣孫明

姚

清

父順孫英

弘

端

曾孫鼎玄孫致遠

天錫

子文榮

商

允

子祥

俊

彭

程

曾祖勝祖壽父王孫雲玄孫大年

宗周

震

次子守中季子守敬

雄

子麟妻張恒清

崔

英

父福

成俊

王

智

祖海父敬

王

貴

祖忠父得

軒

母沈

勲

國賢

弟國治子一初

文祿

父佐母陸族弟文正

童

傑

五世祖保曾祖正祖昇父受子尚孫孫養初

謝

麟

祖敬父毅

馬

旺

父得良子信

文

孫銀

呈圖

繼武

孟驊

子士宏

滿

正

遠祖客來

父失的

潮

子謙

上林

子宗仁

章

鑑

曾祖哈刺海祖瑜父雄

李元律

遠祖成興隆安曾祖仁祖鎮父族

朱

斌

父銘

源

呂榮父全

徐奇祖文父立

陶鏞祖方父璿

炳子堂

胡澄父源

雍德

唐善父祥

陳惠諒祖亨

鯉曾祖璣

唐勝祖文父文興

吳乾遠祖信成毅

王相遠貞

袁金遠祖金友通福

侯左

劉江清本武功人祖永受洪武初歸隸燕山中護衛靖難兵起累功授本衛指揮僉事戰小河死事父海

從定九門永樂改元遷指揮使擢浙江都司僉事卒
江清襲宣德六年改海寧衛指揮使卒子翰嗣翰卒
子寧嗣

寧字時泰署衛事二十五年歲饑移檄請賑且捐
俸以濟所屬戎伍每鄉試校衛士輒設宴餞士子之
與試者於西郊曠學廢黜者則遺免登辱之表張氏
雙節之庭增同僚月俸錢米減城垣窰柴料價因意
周浹為時所稱卒子銳嗣

銳字蓄之號海村能詩文與縉紳鍾梁徐咸輩為

社會有海村遺稿春臺集行世靜志居詩話海村少

食世祿里居賑飢散藥以厚德聞有僕名木善射一

日水鵲集資聖寺鷗吻木射之貫其左翮鵲帶矢盤

旋良久竟集中庭如臆訴者海村曰嘻必木也命拔

其矢縱之不能飛乃命木飼之旬日創愈向主人鳴

舞翺翔而去海鹽卒子湘嗣湘字文伯中嘉靖戊子

人至今能道之鄉試汧字廉伯亦中嘉靖丁酉鄉試洄字近伯中嘉

靖丙午己酉兩科武舉湘卒子岱嗣岱卒子松嗣松

卒子承光嗣承光卒子堯臣嗣

徐鑑本合肥人祖進洪武中以軍卒隸燕山左護衛

靖難初累功授指揮同知從定京師遷徐州衛指揮

使父道者襲道者卒鑑襲宣德中調海寧衛指揮使
卒子恭嗣恭卒子黼嗣黼卒子玠嗣

玠字東泉為人言論侃侃好與賢士大夫交調防
乍浦所勦強植善規畫一新乍人好訟終玠任帖然
畏服自玠以上三世轄衛事皆有賢聲卒子行健嗣
行健少入小學歸父必訓之曰餓死事小失節事
大及長勇決過人承襲後果毅異羣帥嘉靖癸丑倭
寇海鹽行健防敵浦至輒敗去每出戰必密書姓名
於衣上再戰橫涇河及鳳凰山皆斬級百餘丙辰倭

復寇乍浦至北王橋行健迎擊之倭分其衆為二腹背夾攻行健力屈死贈都指揮僉事令子志達襲父職而錄其次子志伊為指揮僉事行健弟行權

行權字雷川形貌醜惡年六十猶應童子試有司憐而慰之曰生甚苦當請於上官予一衿行權謝曰某本勲衛子弟苟志在一衿寄學稱武生足矣特非素願耳作文畢復作進賢歌一篇於尾以見志自是不復入試

王信本定遠人元至正丙午歸太祖為軍卒隸淮安

衛永樂元年以靖難功授金吾衛指揮同知尋遷本
衛指揮使宣德初改海寧衛指揮使卒子斌嗣斌卒
子珙嗣珙卒子鑒嗣鑒卒子勇嗣

勇字國用剛直有謀遇事果決散金錢給困乏者
無所吝人故樂為之用正德中掌衛事奏定班首造
局修城百廢具舉卒子大卯嗣大卯卒子彥忠嗣彥
忠卒子繼茂嗣繼茂卒子國寧嗣勇次子大猷別見
方正先世本儀真人祖勝元至正中歸太祖隸金吾
奉調西征死事父原調羽林左衛靖難時以功累官

指揮同知隸瀋陽左衛正永樂中調海寧衛卒子綱
嗣綱卒子泰嗣

泰工書法及詩中嘉靖丁酉武舉掌本衛指揮事
嘉靖甲寅勦倭有功隆慶中錄其勤事并其麾下
方昇等一百二十九人陞賞有差卒有詩集三卷泰
子弢弢子承恩承恩子戡之

戡之字耆定以承襲擢南京大教場坐營都司值
大閱營兵挾餉亂行厯階而上戡之按劍叱之衆懾
服密白上官擇亂首斬之陞劉河游擊調金山營叅

將備禦有方叅議范允臨為文立碑紀其功遷臨沅
副總兵官安奢二賊梗滇黔賊之自廣林烏蠻灘越
棧度崑崙闕轉入交趾界達臨安扼守楊林水蘭烏
寇大至進屯馬龍州掘塹設伏多張旗幟合副將袁
善兵驅馬直前橫衝之賊勢中斷乃大潰捷聞進官
一階轉漳泉副總兵在滇策普名聲必反白所司宜
早為備既至漳將舟師逐鍾斌合鄭芝龍烏尾船圍
之斌窮蹙錦衣銀帶沉海死金寶盈舟禁官兵勿得
登舟擅取捷書上名聲賄構蜚語中之落職及名聲

反雲撫錢士晉薦起討之以老疾辭不赴年八十五卒

采旺本定遠人父興元至正甲午歸太祖隸燕山中護衛靖難初以功授指揮僉事克金川門再遷瀋陽右衛指揮同知卒旺承襲永樂十五年調海寧衛指揮同知卒子玉嗣玉卒子真嗣真卒子清嗣清卒子錢嗣錢卒子煉嗣

煉字叔鋼負氣有膽畧檄管陸路團操嘉靖癸丑倭犯新塘甯煉率澈浦所兵三百人策應馬呈圖呈

圖先馳入賊圍煉急趨之俱陷陣手斬二賊力屈與指揮陳善道俱死子鳳翔襲陞本衛指揮使鳳翔卒子成文嗣成文卒子夢賜嗣善道始末失傳

九德字常吉煉族子也以本衛官舍入試為諸生萬厯初鄉貢授餘杭訓導遷龍泉教諭再遷靖盧衛教授倭變時九德取幕府日劄備錄之為倭變事畧二卷子士英字茂含亦諸生博覽經史晚結茅海上之藍田野著海寧衛乘十卷

彭程字懷遠號椒山本全椒人曾祖勝元至正中歸

國隸金吾左衛以征雲南功授平越指揮僉事祖壽
承襲父玉調海寧衛程正統中檄征沙縣賊鄧茂七
擒渠寇三人攻前洋後洋寨鵝峯山大竹口嚴家島
黃金井招撫餘賊千二百人景泰九年復征葉宗留
大戰天井背周寮寨斬級六十一擒渠寇五人進指
揮同知初程受都督劉聚檄征茂七啟行禡祭諸生
仲端相禮捧毛血盎不慎墮地而破程怒按劔擬之
端曰盜破賊必破矣程笑而領之遂連破賊兩浙名賢錄正
統十三年沙縣鄧茂七據延平稱剽平王程受檄往
討明年正月甯延平方下營某帥招飲以移營不赴

帥不悅其夜賊劫程營不值驚遯明日程入謝帥知
之大服且問故程曰下營時有怪風占必有偷營者
故移以避之一軍稱神明時聞剛屯兵大山程傍溪
結營賊首朱必森率兵隔溪過呼其屬指而謂曰先
滅大營回軍盡殺此輩程下馬偏拜衆軍曰賊果得
志回我屬無幸矣當於死中求活衆曰諾無何賊果
乘勝回下溪水挑戰程諸軍跣足迎之子紳襲指揮
半渡賊鞋襪洩水拔足不能出大敗子紳襲指揮
同知紳子雲字晚松父疾嘗割股療之子端服宗孟
履歷無字潮溪端服子大年字蠡湖嘉靖中倭寇縣
服字父端服戍守唐家灣兵單弱大年募死士四十人赴
之斬倭七級倭遁去大年子紹賢

紹賢字孔嘉號對薇左目重瞳子少為諸生既承

襲中萬厯己卯武舉擢守禦浦子口都司江水潰溢
民大飢條上救荒事宜預給衛軍月糧調鳳陽留守
都司遷陝西掌印都司濬西安府城濠陞蘇松分守
叅將議移寶山哨與浙海會符防汛請郡粟貯衛倉
就近給軍巡撫欲去民塚以擴金山衛城外濠紹賢
力爭得寢終以此忤罷歸晚築園於南城曰水月居
紹賢娶刑部尚書鄭曉女生子宗孟宗周宗孟別見
宗周字于德以兄宗孟讓襲指揮同知薦擢寧紹
營中軍守備進溫處北洋游擊分督水師至先清虛

伍蒐軍實謹哨探終潯梧叅將

嚴政本金椒人父嗣元至正丙申歸太祖隸牛塘營
洪武八年授安豐所百戶十一年遷濟陽衛副千戶
從征灰山金州至百眼井卒政承襲二十八年遷海
寧衛指揮僉事卒子瑞齡嗣瑞齡卒子明嗣明性廉
介遷浙西備倭把總撫馭有方海濱賴之卒子震嗣
震善騎射手搏及劍術尤好文喜談論能詩藏古
書籍彙鼎名畫法書甚多延納名流觴詠不厭疊石
鑿池畜數鶴於中盤桓其間自號鶴汀生卒子守約

嗣守約卒子有翼嗣有翼卒子廷傑嗣震次子守中
嘉靖甲午武舉季子守敬嘉靖辛酉隆慶庚午武舉
姚清本浮梁人父順陳也先百戶元至正丙申歸太
祖隨征陳友諒於鄱陽湖戰捷授武昌衛百戶卒清
以洪武中調海寧衛指揮僉事卒子廉嗣廉卒子英
嗣調補潮州衛英卒子雄嗣

雄景泰中征三山賊累功進指揮同知天順元年
復調歸本衛卒子麟嗣麟妻為給事中張寧女名恒
清婚未幾麟卒撫孤鸞成立得承襲鸞卒子昌嗣昌

卒子弘嗣

弘襲本衛指揮僉事嘉靖乙卯倭據柘城調主客兵合二十萬屯金山衛討之弘與指揮邵鼎生員于岳陷陣進薄陶宅賊且敗遽入賊巢為所刺三人皆死弘子師期襲

崔英本鳳陽人父福從征吳越閩蜀上都累功官金華千戶卒英襲調定海衛洪武二十八年遷海寧衛指揮僉事子端

端字惟正善騎射兼工詞翰正統中從都督徐恭

征鄧葉二寇擒渠帥陶得禮進本衛指揮同知景泰

中貢倭所在需索上官檄端護送卒

兩浙名賢錄稱其偉軀幹多齊

力騎射精捷器識不羣喜觀圖書禮接賢士大夫以勞頓疽發於背卒時年四十三子章孫弢俱世襲弢子鼎字元器年少即受事方峻寡言笑掌本衛指揮調掌台州衛擢本省備倭把總卒子致遠嗣致遠字道徵嘉靖癸卯武舉致遠子成俊

成俊字朝彥初以衛舍應試補諸生兩中副榜致

遠卒不得已承襲三登萬厯癸酉丙子己卯武鄉試部試不售又以忤上官罷成俊善屬文雖蒙家蔭非

其所好著祭書祭劔等集卒時謂其子天錫曰葬我必用儒者服從之

天錫字青芝少任衛事中萬歷戊子辛卯甲午三科武舉萬歷甲辰會試登進士實授本衛指揮使遷本省備倭把總尋轉廣東都司僉事進中都留守出為南贛營叅將廣東副總兵官入為南京都督府僉書進左軍都督鎮守廣東總兵官集祖父以來敕誥及生平歷官詔諭碑銘為德音錄子文榮天啟辛酉武舉承襲

王智本黃岡人祖海陳友諒據武昌累官都鎮撫元至正甲辰歸太祖授橫海衛千戶卒父敬嗣洪武中累功至宣州衛指揮僉事智洪武三十五年調海寧衛宣德初檄征交趾有功歸未敘卒子清嗣清卒子瑤嗣瑤卒子幼失黃以總旗隨衛為軍舍

商允本南通州人洪武十八年歸滎陽侯授總旗自彭城衛調大寧前衛靖難初累功遷平陽衛指揮僉事永樂十六年調海寧衛卒子祥嗣祥宣德二年征交趾至任昌汀戰歿子懋嗣懋卒子經嗣經卒子論

嗣論卒子鉉嗣鉉卒子霖嗣霖卒子大成嗣大成卒
子希元嗣希元卒子執中嗣執中卒子應文嗣

王貴本姓脫其先康里國人祖忠洪武中入金山衛
歸附穎國公傅友德隸永平衛靖難初累功授遵化
衛指揮使賜姓王氏永樂八年征迤北陞陝西行都
司都指揮奏言寧夏甘肅等衛地隣邊境宜於平涼
慶陽運粟五六十萬以備兵儲報可父得洪熙中征
迤北歿於陣貴承襲宣德十年調海寧衛指揮僉事
貴卒子俊嗣

俊善騎射徵征沙處賊從都指揮王鉞累戰金華之沿滄嶺麻洋麗水龍潭武義之王皮阮諸處論功賜金牌綺鈔未幾以鉞事坐累不得遷卒于軒嗣

軒字載之性至孝事母沈遠在數十里饋食必令人視食否以聞沈教軒曰人當習一藝以謀生吾見富貴之家中落率多無賴以一無所長故也軒於是精祿命占卜之術出汛沈家門千戶滿正後至軒責之曰來何暮正曰今日室人生男故遲軒按其生時推之曰千戶却生指揮矣正後征桃源賊陣亡于潮

得陞二級承襲或言分巡副使由海寧來當至縣軒
卜之曰不來或曰已見輿從出東門矣已而果以他
事返每歲正旦必卜卦以審休咎正德庚午正月卜
得同人值歸魂嘆曰已矣為酒召僚友訣別是歲卒
兩浙名賢錄 子臣嗣臣卒子勲嗣
見方伎傳

勲字世榮中正德己卯武科有膽力善檄捕私
販鹽丁亂禦橫刺之發二矢斃其二人餘悉獲乍浦
有悍卒七人時號七虎上官令捕之夜出詣境悉得
之無遺予國賢

國賢字應昌美如冠玉中嘉靖甲午武科第一乙

未成進士遷都指揮同知掌福建都司印改掌本省
都司印卒子一初嗣一初字子復中嘉靖壬子乙卯
戊午三科武舉卒子洪綬嗣洪綬卒子兆騏嗣國賢
弟國治字應德中嘉靖丙午壬子乙卯三科武舉

文祿字世廉號沂陽父佐軒仲子性倜儻精騎射
擊劒母陸氏初娠依古胎教法安絃讀書以為常友
文祿長教之甚有條理每購書遇缺文誦而補之有
疑便令考據務使通曉文祿少為諸生有文名中嘉

靖辛卯鄉試居身廉峻戶田三百請編役如平民令
有不廉者因公車之餞文祿拔劔起舞屢向之曰此
劔能斬貪汚年八十餘猶就京師^試與秀水呂科稱
為二老然本業久荒萬厯丙戌首題文祿以諧語作
結主考內閣王錫爵舊與文祿定布衣交索卷讀之
以為笑談文祿性好書購得萬卷置一樓藏之俄而
家失火大哭謂人曰但能救書者重賞他物不必也
所著百陵學山王生藝草龍興慈記海鹽文獻志海
寧衛志等書卒無子學使陳大綬檄祀學宮_{見兩浙名賢錄}

族弟文正字世祥善草書能詩為衡王府記室以謹

密為王所重

見青州府志

童傑本桐城人五世祖保洪武四年隸羽林左衛高祖那兒靖難初累功遷燕山中護衛副千戶戰齊眉山死事曾祖正永樂五年遷指揮僉事祖升父受承襲傑成化二十一年改海寧衛指揮僉事卒子勲嗣勲卒子堂嗣堂卒子尚斌嗣尚斌字忠兼中嘉靖己酉壬子乙卯三科武舉丙辰成進士授指揮力學如寒士卒子養初嗣仍授指揮僉事署本衛指揮以才

薦擢松海營把總卒子乾嗣乾卒子鍾嗣

謝麟其先遂平人祖敬元末為安陽帥至正甲辰歸
太祖即授英武衛百戶從攻蘇州婁門監築敵臺為
箭所傷卒父毅以死事子襲陞太倉衛所鎮撫麟洪
武三十三年調海寧衛左所鎮撫正統十四年檄征
福建有功受賞卒子芳嗣芳卒子震嗣

馬旺本懷來人父得良濟州衛軍卒旺由靖難功授
遵化衛正千戶調征迤北還宣德六年改海寧衛千
戶卒子信嗣信以奉調戰歿子文嗣

文景泰元年檄征溫處賊守永康縣攻敗賊首朱
必森進次麗水謝山擒賊吳廷方破麻洋研珠二寨
入天井背擒賊首王仁又連破方前平寨以功遷本
衛指揮僉事卒子瑞嗣瑞卒子銀嗣銀為人馴謹領
漕務平恕得士心時劇寇劉六擾山東連焚運艘銀
設計保護獨得全銀卒子呈圖嗣

呈圖字兆先號猊峰好古能詩文有儒將風未冠
補本衛指揮僉事嘉靖丁酉中式武舉壬子五月倭
犯海鹽入砂腰場及新塘觜呈圖統本衛驍軍李咬

住等同把總王應麟生擒真倭二十四人次年四月初一日倭酋八大王等自青村登岸衝突金山衛之白沙灣所犯汛堡官軍俱敗呈圖提兵出戰身被三十餘鎗而死呈圖與滿潮采煉徐行健李元律王繼及薛炯采應蘭等十五人以事死子繼武奉敕並祀於游擊將軍宗禮祠

繼武以父死事承襲為海寧衛指揮同知嘗以父讐未報為恨遷松海把總萬厯庚辰四月有倭船泊岸繼武親督官兵戰於西磯海洋犁沉倭船生擒倭奴一十名親斬首搖戍郎首級一顆又於大陳洋岐

外生擒倭二名斬首一十七顆師旋松門設父呈圖
位集前後倭首且生剖其心列祭於前慟哭再拜以
報父歿之讐見者感動遷湖廣都司改南京副總兵
佐督撫周繼等平劉汝國之亂進南京右軍都督府
僉事提督大教場水陸官兵總理備倭等務卒於官
繼武好內諸姬年少身後皆食貧苦節云子孟驊

孟驊字同伯襲本衛指揮同知萬曆辛丑海鹽民
訛傳倭至時已薄暮又大雨民奔入城諸將令啟半
扉軍士因索錢惡少年乘之掠取囊篋民呼號蹂踐

死者不可勝計孟驊分守南門洎開以待秉燭戒嚴
徐俟民入獨無所損遷吳淞把總進山東都司僉書
登萊游擊再遷臨青蘆塘寧紹叅將有功擢淮徐副
總兵官南京前軍都督僉事海寇劉香流突浙閩三
省會師以原官改浙江鎮守率師出海而香敗死於
閩其父鳳以餘衆詣孟驊降捷聞進都督同知改南
京右軍都督府僉書提督巡江水陸軍務告歸年七
十三卒孟驊工筆札神姿瀟灑其部曲多致上將子
士宏鄉貢德安知縣

滿正字公直本黑山衛人其先曰吳允誠元恭順侯
生五子其第五子命名滿客來後人遂以滿為姓永
樂七年來降隸涼州衛八年授本衛正千戶卒子朵
羅禿嗣朵羅禿卒子打歹嗣正統中奉調征口北戰
歿子打蘭台嗣調南丹衛打蘭台卒子滿失的嗣即
正父也失的為海寧衛左所千戶卒正承襲正德中
解軍械之京師時劉六劉七騷亂山東屢與之遇力
戰却之行次滄州賊復大至入見州守欲與嬰城守
懦不能戰適胡世寧以軍至遂協力守禦賊圍城八

晝夜卒不能破

見明史蔡大事記

尚書張縉上其功即遷

本衛指揮僉事調征桃源賊開常深入被害有卒倪

垣控馬亦死之贈明威將軍

兩浙名賢錄有傳

子潮

潮

一作朝

字廷臣以死事子襲授海寧衛指揮僉事

稍遷至指揮使倭酋八大王擁衆由金山潛踰梁莊
潮率千戶王繼隆等追殺與賊對敵斬獲稍前至新
塘賊設伏於古廟中突出被殺子子謙

子謙幼失母繼母嘗擠之井不死事之益恭待所
出弟妹恩禮兼至承襲指揮同知居官清謹治家尚

儉與人交尤敦厚和柔無機心械事生平不二色手足甲皆厚數分腹堅如石臍帶至老不落嘗以營務至麥莊涇坐里人李璠家有白龜盈尺入其室向子謙昂首注視子謙放之深淵龜入水猶數迴顧又領水師防海至陳錢馬蹟大洋忽有絳情神人來迎霞光映水海盡赤壽至一百一歲無疾而卒子上林嗣上林生而有力輪刀如飛弓輓二石善射及二百步又善調馬一經控策無不受馭者後逐賊於硤石戰死子宗仁承襲以死事故進海寧衛指揮為人所

害無子矢襲

章鑑其先遼陽人曾祖哈刺海元末為將戍遼東洪武二十年率部兵款關來降授指揮僉事從征雲南二十二年調金山衛指揮僉事二十八年遷浙江都指揮僉事祖瑜降授本衛正千戶父雄嗣職鑑成化二年調海寧衛中所正千戶卒子甫卿嗣甫卿卒子國賢嗣國賢卒子耀忠嗣耀忠卒子弘憲嗣

李元律字師吉本滋陽人七世祖成歸韓國公隸濟州衛累功授燕山左護衛指揮同知戰於小河死事

六世祖興隆遷金吾衛指揮使五世祖安承襲曾祖
仁成化間從平江伯理漕奏改海寧衛坐累降千戶
祖鎮一作振父煥字堯章號白核元律少就文試為諸

生累年不欲承襲會無以次軍舍乃就職進指揮掌
衛事中嘉靖壬子武解元倭入寇奉調領兵防守富
陽等處擒斬倭賊數十名復從叅將盧鏗追戰於孟
家堰遇伏力戰歿於陣賊乘勝據石墩山事聞贈都
指揮僉事子鳳鳴嗣是戰也都司周應正處州千戶
薛炯寧波百戶宋應蘭實錄作應潤皆以調來赴亦死於

陣兵士死者一千四百七十五人

朱斌其先興化人父銘從張士誠為軍校破蘇州以

功為將軍

紫桃軒又綴張士誠取三興
土築王府基嘉興宜興長興

元至正丙申

降太祖授鷹揚衛百戶洪武元年征梁陝三年戰於

會寧陣歿斌嗣職調南昌衛十八年征潁州陞副千

戶二十七年調海寧衛右所副千戶卒無子以姪源

承襲

源景泰元年檄征金華白姥賊攻破寇寨進次武

義港累戰斬級至王皮阮擒寇首何燈三年以功陞

本所正千戶卒亦無子以姪政襲政卒子永嗣政襲
副千戶卒子爵嗣爵卒子朝重嗣朝重卒子民悅嗣
呂榮其先海州人吳元年太祖征陳友諒榮父全於
九江陣降授濟寧右衛小旗從征北平抵沙漠又從
征卜魚海子遷太原右護衛百戶榮洪武三十四年
從征迷河永樂八年從征瓦剌論功陞本衛副千戶
十六年調海寧衛左所副千戶卒子謙嗣謙卒子論
嗣論卒子鳳嗣鳳卒子綬嗣綬卒子銳嗣銳卒子調
陽嗣調陽卒子如望嗣

徐奇本和州人祖文以軍卒從太祖渡江取采石磯克陳也先水寨復征吳楚洪武元年護駕至北京陞大梁衛百戶八年陞永平衛副千戶卒父立嗣調彰德衛副千戶卒奇襲永樂五年調海寧衛前所副千戶景泰五年檄征江西山賊戰歿子震嗣震卒子玉嗣玉卒子恩嗣恩卒子憲嗣憲卒子承爵嗣

陶鏞其先定遠人祖方元至正丁酉歸曹國公李善長從征浙東授杭州右衛百戶父璿調廣西河泥所百戶鏞洪武三十四年調海寧衛左所百戶以功陞

副千戶卒子洪嗣正統中征延平以功受賞洪卒子
桓嗣桓卒子炳嗣

炳字德明高談自負善騎射中正德己卯鄉試檄
征開常賊率阮兵進東臯斬級二又與賊首蔡六二
戰於太平寺斬級三又與王浩八戰斬級二進攻瑤
田會八省兵壁於貴溪縣之裴源攻煙坊與陳邦四
戰累功陞左所正千戶先是炳家居其廳事屋脊上
夜常有光視之則架上刀光也有功後名其廳事為
瑞劒堂炳能詩善行草炳卒子堂嗣堂中嘉靖壬午

乙酉戊子甲午四科武舉卒子情嗣情卒子遇春嗣
遇春卒子希堯嗣希堯卒子允明嗣

胡澄其先徐州人父源元末為淮安趙丞相軍將至
正甲辰降於叅軍胡大海隸處州衛中丞章溢薦之
朝授百戶吳元年從攻通州洪武四年調建寧右衛
百戶澄嗣父職二十二年調海寧衛前所百戶永樂
七年出使日本還八年受賞卒子鋼嗣鋼卒無子弟
鑑嗣鑑卒子福嗣福卒子玉嗣玉卒子翰嗣翰卒子
節嗣節卒子嘉龍嗣嘉龍卒子武卿嗣武卿卒子國

泰嗣

雍德本高郵州人偽周行軍千戶元至正丙午降授
游靖所小旗從攻台州戰傷洪武二年調征蒼山寨
斬級二十四以功授海寧衛右所百戶卒子信嗣信
卒子榮嗣榮卒子寬嗣寬卒子福嗣福卒子昌嗣昌
卒子簡嗣簡卒子國忠嗣國忠卒子淳熙嗣

唐善其先崑山人父祥為張士誠將元至正丙申選
充長淮衛總旗卒善洪武二十六年以趨運遼東授
海寧衛中所百戶卒子誠嗣誠卒子寬嗣寬卒子輔

嗣輔卒子弼嗣弼卒子雲嗣雲卒子世祿嗣世祿卒
子時中嗣

陳惠諒其先蘄水人祖亨從陳友諒起兵參謀畫友
諒立國拜參知政事元至正壬寅太祖南征袁州亨
以城降乙巳禦寇有功丙午授興武衛千戶洪武
四年遷陳州衛指揮僉事卒子英嗣英卒惠諒嗣洪
武二十六年降授海寧衛右所百戶卒子銘嗣銘卒
子麟祥嗣麟祥卒子鵬臺嗣鵬臺卒子邦策嗣邦策
卒子明道嗣惠諒族孫鯉

鯉字子龍號霖川曾祖瑣亦以軍舍為百戶鯉嘉靖癸卯本省舉人不第知上蔡縣

唐勝其先蒲圻人祖文為陳友諒總管萬戶元至正壬寅降於太祖從征贛州進攻南康取福建遷蘇州衛百戶卒父文興嗣洪武十四年調金山衛百戶勝洪武三十五年調海寧衛中所百戶卒子英嗣英卒子僅嗣僅卒子武嗣武卒子洪嗣洪卒子楷嗣楷卒子家瑞嗣家瑞卒子虞化嗣

吳乾其先南城人遠祖信元至正辛丑歸隸建昌衛

吳元年調征福建卒子成累功授豹韜衛百戶征金山赤迷河卒子毅嗣宣德二年征交趾戰歿子浩嗣浩卒子濬嗣濬卒子銓嗣銓卒即乾嗣正德十一年調海寧衛後所百戶卒子鳳岐嗣鳳岐卒子國勲嗣國勲卒子正仁嗣正仁卒子中俊嗣

王相仁和人遠祖貞永樂中為本衛右所百戶相襲職倭寇海鹽戰歿於白馬堰子承恩襲承恩卒失其黃

素金其先蒙城人元末有與金同名者以軍將守宣

州至正戊戌降於太祖仍守宣州調征江西陳氏授
千戶攻邵武南門箭傷卒子友嗣調碭石衛千戶卒
子通嗣坐累降授紹興衛所鎮撫檄征交趾歿於陣
子福嗣征延平山賊有功遷本衛正千戶卒子恩嗣
金恩子也嘉靖十六年降海寧衛後所百戶卒其子
某以功仍改襲紹興衛千戶

侯左不知所從來充海寧衛軍卒調隸總司正德中
張鯤由溫州衛指揮遷海鹽總兵官檄征開化賊鯤
時守察西寨游軍遇漆客巴元宗於山中縛之將以

為賊俘而獻之左控馬諫曰昔曹彬下江南不妄殺
一人子孫永昌請釋之鯤不聽卒送都指揮李隆斬
之